



RESOLUCIÓN REITORAL DO 31 DE MARZO DE 2017 POLA QUE SE ESTABLECE O PROCEDIMENTO PARA A VALIDACIÓN PARCIAL DE ESTUDOS ESTRANXEIROS NA UNIVERSIDADE DE VIGO

O Real Decreto 1393/2007, do 29 de outubro, que desenvolve a estrutura das ensinanzas universitarias oficiais de acordo coas liñas xerais emanadas do Espazo Europeo de Educación Superior, fomenta a mobilidade dos estudantes e potencia a apertura de cara a quen proceda doutros países do Espazo Europeo e doutras áreas xeográficas, marcando unha nova estratexia no contexto global da Educación Superior.

Así mesmo, o artigo 30 do Real Decreto 412/2014, do 6 de xuño, polo que se establece a normativa básica dos procedementos de admisión ás ensinanzas universitarias oficiais de grao, contempla o acceso de estudantes con estudos universitarios estranxeiros parciais ou totais que non obtiveran a homologación ou equivalencia en España.

Por todo o exposto e en cumprimento do acordo do Consello de Coordinación Universitaria do 25 de outubro de 2004, que fixa os criterios xerais aos que terán que axustarse as universidades en materia de validación e adaptación de estudos cursados en centros académicos españois e estranxeiros e, do Real Decreto 967/2014, do 21 de novembro, que establece os requisitos e o procedemento para a homologación e declaración de equivalencia a titulación e ao nivel académico universitario oficial e para a validación de estudos estranxeiros de educación superior, é polo que, en virtude das facultades que lle outorgan os Estatutos da Universidade de Vigo (DOG do 2 de febreiro de 2010),

ESTA REITORÍA RESOLVE:

Ditar o procedemento de validación parcial de estudos estranxeiros, suxeito ás seguintes normas:

PRIMEIRA. Condicións para a participación

Estará en disposición de solicitar a validación parcial de estudos estranxeiros quen se atope nalgunha das seguintes situacións:

1.1. Estudos estranxeiros non concluídos

Cando os estudos estranxeiros de educación superior realizados cumpran os criterios que fixe o Consello de Universidades e non conclúsen coa obtención do correspondente título.

1.2. Estudos estranxeiros concluídos

1.2.1. Cando os estudos estranxeiros de educación superior realizados cumpran os criterios que fixe o Consello de Universidades, conclúsen coa obtención dun título estranxeiro, e a

persoa interesada non solicitase e declare que non vai solicitar a homologación do mesmo por un título universitario oficial español ou a equivalencia a titulación e a nivel académico universitario oficial.

1.2.2. Cando tendo solicitada a homologación do título estranxeiro ao Ministerio de Educación, Cultura e Deporte (MECD), esta fose denegada, sempre que a denegación non se funde nalgunha das causas recollidas no artigo 3.2 do R.D. 967/2014.

SEGUNDA: Criterios para o recoñecemento

Os recoñecementos faranse, de xeito xeral, en plans de estudo que non se atopen en proceso de extinción xa que non poderán ser admitidos estudantes en titulacións nas que tiveran que cursar materias das que non se imparte docencia.

Serán susceptibles de validación as materias superadas sempre que as competencias e carga lectiva acreditadas sexan equivalentes ás correspondentes materias incluídas no plan de estudos ao que se pretende acceder. Terán a equivalencia en puntos correspondente á cualificación obtida no centro estranxeiro de procedencia.

TERCEIRA: Prazo e lugar de presentación de solicitudes

O prazo de presentación das solicitudes de recoñecemento será o mes de abril e farase de forma presencial na secretaría do centro que imparta o grao obxecto de recoñecemento, por correo certificado ou nas representacións diplomáticas ou oficinas consulares de España no estranxeiro.

Cando a titulación se imparta en mais dun centro da Universidade de Vigo deberase optar unicamente por un deles.

CUARTA: Documentación

1. Modelo de solicitude. Indicaranse os estudos que se pretenden realizar e as materias do plan de estudos para as que solicita recoñecemento. (Anexo I).
2. Xustificante de ter aboado o importe correspondente para este procedemento a partir da súa aprobación polo Consello de Goberno e ratificación polo Consello Social da Universidade de Vigo.
3. Copia do DNI, NIE ou pasaporte.
4. Certificación académica dos estudos universitarios realizados, na que se inclúa o número de materias e créditos superados na universidade de orixe, carga lectiva e sistema de cualificacións de procedencia. A certificación académica nun idioma distinto do galego ou castelán, acompañarase da correspondente tradución xurada. Neses casos a certificación indicará, así mesmo, as cualificacións máxima e mínima do sistema de avaliación correspondente e farase constar cal é a cualificación mínima para aprobar.
5. Programa das materias superadas, expedido polo centro correspondente e plan de estudos que inclúa as materias que se esixen para obter a titulación de orixe que se pretende validar, selado polo centro de procedencia.
6. En caso de estudos parciais, declaración xurada de non ter finalizados os estudos que se queren validar.
7. En caso de que os estudos obxecto de recoñecemento estean concluídos:

- a. Declaración xurada de non ter iniciado simultaneamente un procedemento de homologación ou de equivalencia a titulación e a nivel académico universitario oficial do título en España.
- b. Denegación da homologación do MECD, por causa distinta ás mencionadas no artigo 3.2 do R.D. 967/2014, na que conste expresamente a posibilidade de validar parcialmente.

O alumnado con titulacións de países alleos ao EEES, no momento da formalización da matrícula terá os documentos dos apartados 4 e 5 legalizados por vía diplomática nas embaixadas ou consulados de España e co visto e prace do Ministerio de Asuntos Exteriores de España (Calle José Abascal, 41 – Madrid). Os selados coa Apostilla de La Haya non precisan outra legalización diplomática ou consular.

QUINTA: Resolución

As solicitudes de recoñecemento para quen teña estudos universitarios estranxeiros parciais ou completos, resolveranse por delegación reitoral polos órganos de dirección do centro antes do 31 de maio. As resolucións terán validez mentres estea en vigor o plan de estudos da titulación obxecto de recoñecemento.

5.1. Recoñecemento dun mínimo de 30 créditos

Quen obteña este recoñecemento e desexe matricularse na Universidade de Vigo poderá solicitar a admisión por esta vía de acordo co establecido na convocatoria de matrícula para cada curso académico. Os recoñecementos faranse efectivos na unidade administrativa correspondente no momento da formalización da matrícula.

5.2. Recoñecemento de menos de 30 créditos

Neste caso, quen desexe acceder a unha titulación de grao na Universidade de Vigo terá que solicitar a admisión a través dos procedementos telemáticos que estableza a (CiUG) para o que deberá superar a proba de acceso ás universidades españolas, salvo que os estudos preuniversitarios, de ter sido homologados dean acceso directo á universidade sen necesidade de superar probas de acceso, sen prexuízo das prioridades temporais e criterios de valoración establecidos no R.D. 412/2014.

Para facer efectivos os recoñecementos a persoa interesada deberá dirixirse a unidade administrativa correspondente unha vez formalizada a matrícula.

SEXTA: Outros requisitos

A quen sexa nacional de Estados que non teñan como lingua oficial o castelán, a Universidade de Vigo poderá esixirlle a proba de idioma que considere oportuna.

SÉTIMA: Disposición adicional

Dado que á data da entrada en vigor desta resolución non está aprobado o importe correspondente para este procedemento, indicado no punto 2 da norma CUARTA, polo Consello de Goberno e ratificado polo Consello Social da Universidade de Vigo, este aplicarase a partir do momento de dita aprobación.

OITAVA: Normas finais

Contra esta resolución, que esgota a vía administrativa, poderá interpoñerse recurso perante a xurisdición contencioso-administrativa, no prazo de dous meses contados dende o día seguinte ao da súa publicación, de conformidade co disposto na Lei 29/1998, do 13 de xullo, reguladora da Xurisdición Contencioso-Administrativa (BOE 14/07/1998).

As persoas interesadas poderán optar por interpoñer contra esta resolución recurso de reposición, no prazo dun mes contados a partir do día seguinte á publicación da presente resolución, perante o mesmo órgano que a ditou. Neste caso non se poderá interpoñer un recurso contencioso-administrativo ata que sexa resolto expresamente ou se producira a desestimación presunta do recurso de reposición interposto, segundo o previsto no artigo 123.2 da lei 39/2015, de 1 de outubro, do Procedemento Administrativo Común das Administracións Públicas (BOE 02/10/2015).

NOVENA: Entrada en vigor

A presente resolución entrará en vigor e terá efectos a partir do día seguinte ao da súa publicación.

Vigo, 31 de marzo de 2017



Salustiano Mato de la Iglesia

Vigo, de de 20

(sinatura)

Sr/a. Decano/a ou Director/a da